

四庫全書

史部

欽定四庫全書

欽定大清會典則例卷二十四

吏部

考功清吏司

邊禁

一邊禁康熙十二年題準外國之人私自進口
該管地方官不行察報者降一級調用該管上
司罰俸一年○十四年議準土官地方失事止

限年緝拏限滿不獲降一級畱任如斬絞重犯
脫逃亦限年緝拏限滿不獲應降一級二級三
級調用者止降一級畱任應降四級五級調用
者止降二級畱任應革職者止降四級畱任如
遇貪酷不法等罪所犯重大仍行革職如諱盜
因公呈誤例應革職等罪者皆免革職亦降四
級畱任○二十一年議準土司地方將逃人失
察一名或被別土司拏解或逃出之人供在某

土司處將該土司降一級若在伊該地方明知
故行隱諱不行出首者照隱匿逃人例革職○
二十二年議準滇黔土司無論逃人逃兵有拏
解六十名者準加一級如多獲者亦照此數遞
加不及加級者令該督撫酌量獎賞○三十年
題準土官凡有

欽部案件奏銷錢糧及遲誤

表箋等項皆應照處分流官定例一例處分但土

官不食俸祿如有罰俸降俸等事皆照其品級計俸罰米每俸銀一兩罰米一石移貯就近常平倉以備賑荒。四十二年題準湖廣鎮寧紅苗既設同知通判分界管理苗務其五寨司土官土民應聽該廳管轄遇有逃盜等事照例將土官一幷處分。四十三年題準紅苗歸誠納糧特設土官管轄除苗人有犯輕罪者仍聽土官自行發落外若有犯殺死人命強盜擄掠人

口搶奪財物及捉拏人口索銀勒贖等情責令
土官將犯罪之苗拏解道廳治罪如土官將犯
罪之人藏匿不卽行解送者革職○又題準紅
苗捉人勒銀取贖者令土官將犯罪之苗解送
道廳衙門審理治罪外其該管土官雖不知情
但平日不嚴行約束有一起者將土知府知州
罰俸三月有二起者罰俸半年有三起者罰俸
一年若該管官知情不行禁止者皆革職不準

折贖責四十板若繫教令或通同取利者革職
不準折贖枷示三月○又題準黔楚相接之苗
每因小忿動輒搽戈殺擄彼此拏人其該管土
官雖不知情但平日不嚴行約束以致彼此互
相構釁聚衆不及五十人者將土知府知州罰
俸三月至五十人者罰俸半年至百人者罰俸
一年百人以上者革職若繫知情不行禁止者
革職不準折贖枷示一月責四十板若繫教令

或通同商謀希圖均分財物者皆照首犯一例治罪○四十七年覆準民人擅入苗地民苗結親往來該管各官失於覺察者降一級調用該管上司罰俸一年○又議準各省地方遇有民苗爭訟事件該督撫嚴飭該管各官作速察審完結如地界兩省或有關提之人或有會勘之處兩省大吏務須和衷辦理不得互相推諉如不肖有司託故稽遲巧爲推卸者該督撫指名

題叅照例分別議處若該督撫任其遲延推卸不行題叅亦照例議處○雍正二年

諭四川陝西湖廣廣東廣西雲南貴州督撫提鎮朕聞各處土司鮮知法紀所屬土民每年科派較之有司徵收正課不啻倍蓰甚至取其馬牛奪其子女生殺任性土民受其魚肉敢怒而不敢言莫非朕之赤子天下共享樂利而土民獨使向隅朕心深為不忍然土司之敢於恣肆者大率皆漢姦爲之指使或緣事

犯法避罪藏身或積惡生姦倚勢橫行此輩粗知文義爲之主文辦事教之爲非無所不至誠可痛恨嗣後督撫提鎮宜嚴飭所屬土官愛惜土民毋得視爲魚肉毋得濫行科派如申飭之後不改前非一有事犯土司叅革從重究擬漢姦立置重典切勿姑容寬縱以副朕子惠元元遐邇一體之至意欽此○三年覆準凡土官病故限六月內具題承襲其該督撫未經具題之先亦卽令應襲之人照署事官

例用印管事地方官如有抑勒沉閣雷難者將該管上司皆照違限例議處其支庶子弟中有馴謹能辦事者許本土官詳報督撫具題請

旨酌量給與職銜令其分管地方事務其所授職銜視本土官降二等如本土官繫知府則所分者給與通判銜繫通判則所分者給與縣丞銜照土官承襲之例一例頒給

勅印號紙其所分管地方視本土官多不過三分之

一少則五分之一此後再有子孫可分者亦再許其詳報督撫具題請

旨照例分管地方再降一等給與職銜印信號紙○
四年遵

旨議定熟苗熟獐皆一例編排保甲不許容畱面生可疑之人地方官有不實力奉行不能稽察盜賊或別經發覺將專管州縣官降二級調用兼轄官繫同城降一級調用不同城降一級畱任統

轄官降一級照舊辦事如上司揭報題叅者免
議至巖疆交界地方兩地文武互相稽察使匪
類不能潛聚毋得彼此推諉倘保甲鄉勇人等
有疎縱姦徒怠玩巡緝及互相隱匿等弊地方
官未經察出該督撫題叅照例議處○七年議
準無土官管轄之生苗爲盜地方各官照野賊
苗蠻之例議處

野賊苗蠻例
載中樞政考

其有土官管轄之

熟苗爲盜刦殺擄掠男女財物該土司明知故

縱者革職養盜殃民者革職提問如實繫失察致苗蠻侵犯城池及聚一二百人或六七十人城內爲盜村莊道路行劫此等大夥盜賊將該管土官亦革職該地方官不實力緝拏互相隱諱將該地方官並該管各上司照民人爲大夥盜賊例議處

大夥盜賊例載中樞政考

其苗蠻聚集人數無

多平常盜案責該土官限一年緝拏限滿不獲降一級畱任俟獲盜之日開復該地方官初叅

停升限一年緝拏限滿不獲罰俸一年照案緝拏至鄰近苗蠻地方民人被盜未經獲賊之先將該管各官停升俟獲盜之日訊明來去踪跡如盜起自內地以文職爲專管官降二級調用以武職爲兼管官同城者降一級調用不同城者降一級畱任統轄官降一級照舊管事上司官已經報明叅奏免其議處若盜自外來武職照專管官治罪文職照兼管官治罪其土官中

有能嚴行鈴束擒勦賊盜一應案件於一年內
全結者該督撫具奏加一級一年完結過半該
督撫酌量獎賞○又議準凡姦民出入苗地把
守軍兵失於覺察及知而故縱皆照律治罪外
其商賈人等已經驗明如兵役藉端抑勒索詐
者兵役治罪該地方各官一并題叅照失察衙
役犯贓例議處○又議準私通土苗及容畱外
省流棍者失察各官照民人擅入苗地例議處

○又議準辦理土苗事件除不關緊要者照常行文外其緊要事務有應行申報之處及各上司有應行批飭之事均由內署寫就鈐印釘封飭發仍於各內署按年月日期造具印冊密行掛號存案其文武平行衙門緊要文移亦照此例均不得經書吏之手如仍令書吏鈔寫以致洩漏事發之日將本官照洩漏密封例分別議處○又議準凡土苗夷獍有犯命盜搶奪爭訟

等案如該犯住居土官所轄地方該土官經州縣移會徇庇不行拏解該州縣卽揭報督撫題叅將該土官革職擇伊子弟之賢者承襲如果案犯在逃照內地承緝之例六月限滿不獲將該土官承緝不力職名咨叅限一年緝拏限滿無獲將該土官降一級畱任俟緝獲本案兇苗或能拏獲別案兇苗準其開復若應議降級畱任計至五案將該管土司革職擇伊子弟之賢

者承襲如該犯居隔省隔邑均以文到之日爲始限四月務行拏解限滿不解如繫庇匿卽將庇匿之員指名題叅照徇庇例議處若果繫犯逃無獲照承緝兇犯例六月限滿初叅住俸勒限一年緝拏年限滿日復叅降一級畱任計至五案亦行革職。又議準土苗夷猺命盜等案無論案之大小皆照內地所定事件限期審結承審案件以獲犯到官之日爲始盜案限十月

命案竊案限六月雜案限四月限滿不結照例
咨叅接扣限期完結如仍不審結該督撫題叅
照易結不結例議處至苗夷有犯軍流徒罪折
枷責之案仍從外結卽鈔招咨送刑部察覈其
罪應論死並情關重大者一槩不準外結亦不
準牛馬銀抵償務按律定擬題結如有不肖之
員或隱匿不報或改捏情節在外完結者事發
之日將該員照溺職例革職其失察之該管各

官一幷議處。○八年覆準改土歸流之土司家
口應令各該督撫據實確覈其妻妾子女與應
遷之父母兄弟照例遷徙外如該犯止有妻妾
並子嗣及子嗣幼小又無應遷之父母兄弟卽
將伊妻妾幼子免其遷徙安插於本省省城令
地方官稽察管束勿許生事至犯軍流罪改土
歸流之土司家口無論有子無子照例隨同本
犯遷徙外如本犯未遷之先身故及子嗣幼小

者亦將伊妻妾幼子免其遷徙安插省城令地方官稽察管束勿許生事該督撫卽將應行遷徙與應畱本省情由於疏內聲明取具地方官印甘各結報部察覈如該地方官有捏報並無子嗣及子嗣幼小別無應遷之父母兄弟等弊將捏報之該管地方官照軍流人犯無年老父母稱有有以次成丁稱無之例降二級調用轉詳之上司罰俸一年具題之督撫罰俸六月○

又議準土司並家口遷於遠近省安插者飭令該地方官不時稽察毋許生事擾民出境如疎縱土司本犯將該地方官照軍流罪犯取保脫逃例議處如疎縱土司家口照疎脫遞回原籍人犯例議處。又覆準凡兇手盜首逃匿土司地方不拘本省鄰省該土司能解拏五名以上者紀錄一次十名至十四名紀錄二次十五名者加職一級三十名者加職二級如一年不敷

議敘之數準并次年接算議敘不準三年合算
○又覆準土司隱匿兇犯逃人不行拏解族獲
犯之日訊明如繫土司受賄將土司革職提問
不準親子承襲擇本支伯叔兄弟子姪取具宗
圖並夷衆信服印甘各結題請承襲如繫隱匿
不報革職審無受賄情弊仍照定例承襲○十
二年議準新定苗疆地方塘汛兵丁擅役苗民
需索強買等情及各衙門差役經由苗寨擅動

苗夫科斂索詐該管文員如有故縱者革職提問不行察出之該管知府降二級調用兼轄之司道降二級畱任督撫降一級畱任如兵役滋事擾累事發不行申報復希圖掩飾曲爲徇隱者將該員革職不行察出之該管知府降一級調用兼轄之司道降一級畱任督撫罰俸一年如並不知情止於失察者將該員降一級調用不行察出之該管知府降一級畱任兼轄之司

道罰俸一年督撫罰俸六月○十三年覆準土
司省分其土官土人如有差委公務並緝拏逃
盜等事應遠赴外省者許呈明該管官轉報本
省督撫請領咨文牌照知會所往省分外省督
撫於伊事竣日計程勒限毋許逗遛仍給與咨
文執照知會本省督撫倘土官土人不請咨文
執照私赴外省者將土官革職土人治罪不行
管束之本省該管文武各官降一級調用失於

察報之外省地方官罰俸一年如土官土人有
潛往外省生事爲匪別經發覺者土官革職土
人治罪不行管束之該管文武各官降二級調
用失於察報之外省地方官降一級調用○又
覆準貴州雲南四川等省棍徒勾串頑苗緦掠
人口輾轉販賣令地方文武巡緝各官年終分
別勸懲如一年之內有能拏獲興販棍徒並頑
苗十五名者紀錄一次拏獲三十名者紀錄二

次拏獲四五十名者紀錄三次拏獲六十名者加一級再有多獲者照數遞加紀錄至一百二十名者加二級若拏獲一百二十名以上者以應升之官卽用若一年之內不能拏獲爲別處拏獲者每五名罰俸一年十名罰俸二年十五名者降一級調用二十名者降二級調用滿五十名者革職該管土司無降級之例滿三十名者革職其所獲興販棍徒頑苗必將被掠人

口一并拏獲審實定擬報部方準照數紀獎如
有以少報多者將原報官照謊奏請功例革職
若該督撫及該司道等容其朦朧者照謊奏請
功具題官例降二級畱任如有買囑誣報妄拏
良民陷害者照誣良爲盜例分別議處。乾隆
二年議準臺灣地方如有民人不法等事許令
武弁移送地方官究治如兵丁生事滋擾亦許
文員關會營伍責懲如有彼此推諉者照推諉

例罰俸一年並飭各該地方汛防員弁實力奉行彼此按月稽察取具並無兵丁滋擾印結轉報該上司察覈如或有意徇縱將該地方官照徇庇例議處○又議準臺灣漢民不得擅娶番婦違者土官通事照民苗結親媒人減一等例各杖九十地方官照失察苗民結親例降一級調用○三年議準黔省苗民買賣子女謀媒用印地方官於契上鈐印時不實加詳察確實將

苗民男婦濫行用印賣與川販者照外番私自
進口地方官不行察報例降一級調用如來歷
分明胥役家人於驗契用印時故意抑勒藉端
需索許買主賣主當官稟明將胥役家人計贓
治罪官繫失察照失察家人衙役犯贓例分別
議處如繫故縱照縱役貪贓例革職至印買苗
口後有帶回原籍別地方者令其報明地方官
給與路照填注男女姓名年貌關汛員弁驗明

契照放行如有兵役無故畱難勒索財物者許其稟明按律究治倘並無用印契照冒稱良民所買苗口賄通關汛縱放出境者一經發覺兵役計贓定罪該管員弁亦按失察故縱受財各條分別議處○又覆準黔省古州都江八寨丹江台拱清江各廳員所用通事務宜慎選承充止許奉差傳譯苗語不得私至苗寨需索擾累一應苗民事件許令赴該廳員衙門訴告該通

事如有把持朦溷等弊立即嚴拏責革究治仍令古州道不時畱心訪察倘該通事有需索擾累情弊該廳員失於覺察比照新定苗地失察兵役滋事擾累例降一級調用如有意徇縱不行究治者將該廳員比照兵役滋事擾累良苗該管官曲爲徇隱例革職。五年覆準歸化城蒙古命盜等案人犯繫民人由同知協理筆帖式申報都統委蒙古官承緝至事主屍親報呈

內不開兇盜是蒙古是民人者蒙古官雖無疎防之例亦應與同知筆帖式分塗緝獲勒限察叅竣拏獲兇盜後審明是蒙古將不應叅之該協理筆帖式等原叅議處各案悉行銷案開復如審明兇賊繫民人將不應叅之蒙古官記過之案注銷罰過之牲給還倘有以蒙古報民以民報蒙古者一經察出題叅將申報之協理筆帖式照諱盜諱命例革職轉報之同知等皆照

諱盜諱命上司例分別議處蒙古官亦照內地
諱盜諱命之例革職其大朔二府衛所管轄地
方與西四旗雜處該管文員衛弁照例分別責
成辦理至西四旗游牧總管所部蒙古有犯命
案者察叅到日皆照八旗滿洲官兵閒散互毆
至死例將專管之佐領驍騎校照八旗佐領驍
騎校議處兼轄之叅領照八旗叅領議處總管
副管照八旗都統副都統議處其太僕寺馬羣

官員所部蒙古如犯命盜案件察叅到日專管之協領兼管之翼長統轄之總管等官亦照此例分別議處再各協理筆帖式所轄地方如有強劫及搶奪傷人行竊拒捕蒙古民人交涉案件經事主告報到官該筆帖式卽移會蒙古官員訊供如事主向蒙古官告報該蒙古官亦卽呈明都統會同該筆帖式訊供各道報各該上司分別勒限協緝仍分別盜犯是蒙古是民人

繫民人將同知筆帖式等題叅疎防照盜案勒
限緝拏逾限不獲將筆帖式照承緝官例該同
知照督緝官例按限議處如繫該同知自行承
辦事件仍照承辦官例議處繫蒙古其承辦之
蒙古官員交理藩院議處其餘搶竊並未拒捕
傷人各案亦令各行逐案通報其承緝之筆帖
式將已未緝獲各案會報巡撫等衙門分別飭
記功過蒙古官員仍照例按限叅處倘應報之

案該筆帖式與蒙古官隱匿不報或諱盜爲竊減重作輕者察出將承辦官員題叅該協理筆帖式照諱盜例革職該管上司亦照諱盜上司例議處蒙古官亦照內地諱盜例革職其餘搶竊細事如不據實申報者將協理筆帖式等罰俸九月再歸化城蒙古民人交涉命案應令就近各協理筆帖式會同該管蒙古官星馳往驗不必更由同知申報都統簡委以致遲誤其各

扎薩克等處部落亦令就近各協理筆帖式馳赴該地方會同該管官相驗至會審夷漢事件究出實情之後民人照內地律例治罪蒙古照蒙古例治罪如蒙古例內並無正條者呈明都統援引刑部律例治罪如各該員擬罪不當蒙古則由都統覈正民人則由同知覈正務使定擬罪名歸於平允倘有彼此存私偏執已見該上司訪聞卽行題叅其會審限期該都統已經

委員該員務於五日內起程赴協理筆帖式衙門會審即將會審日期報明該管上司存案仍照定例命案扣限六月盜案扣限十月其

欽部事件及一切限期均照內地所定限期辦理如任意遲延分別按限察叅倘有瞻徇推諉以致案懸不結者卽照易結不結例叅處至歸化城蒙古劫殺搶竊應該都統等自行審理之案皆以人犯到官之日爲始照內地

欽部事件例定限四月審結咨送理藩院覈擬具題
逾限不結將承審遲延各官據實指叅其有會
同別旗及各扎薩克官員審理者道里相隔遠
近不等應仍照內地例盜案統限十月人命搶
竊統限六月完結○十九年覆準臺灣地方逼
近生番雖設立界址嚴密巡察而突行戕殺之
事仍所時有向來該督撫等將該管文武員弁
開叅疎防均照民苗出入例議以降一級調用

但內地命盜案件均有承緝年限限滿不獲始
行降調至生番殺人之案一經指叅卽罹降調
誠恐承緝之員明知降調在邇不上緊設法緝
拏其或畏避處分諱匿不報應照內地命盜承
緝之例嗣後生番殺人之案皆扣限六月察叅
將地方文武各官議降一級畱任勒限一年緝
拏限內拏獲準其開復不獲卽照所降之級調
用

海防

一海防康熙十一年題準凡官員兵民私自出海貿易及遷移海島蓋房居住耕種田地者皆拏問治罪該管州縣知情同謀故縱者革職治罪如不知情革職永不敘用該管府道各降三級調用總督統轄文武降二級畱任巡撫不管兵馬降一級畱任文武官員有能拏獲本汛出界姦民者免罪拏獲別汛出界姦民十名以上

者紀錄一次百名以上者加一級總督巡撫統轄全省道府管轄數州縣該管地方文武官員拏獲或被兵民拏獲者總督巡撫道府皆免議至道府所屬之人出界如被上司拏獲或非本汛繫別處拏獲者仍照定例處分督撫亦照此例如將違禁出海貿易之人不行舉首反以外海作爲內地或爲隱匿或擅給印票往來偵探通商漂海皆革職提問其轉詳並未經察出之

道府各降三級調用總督降二級畱任巡撫降一級畱任其出界曬鹽者亦照出界例處分。

又題準海賊殺劫村莊民人地方文職州縣官與同城知府等官各罰俸一年該管同城道官罰俸六月照案緝拏。十二年題準在洋行走之船經過地方各官並買貨物之地方各官知船經過縱其行走者革職不知者免議。又議準官員奉遷沿海居民將不應遷之民妄遷應

遷之民不遷者革職如未遷民之先不報上司
或安插遷民稱地窄田稀無可撥給者各罰俸
一年○十五年議準姦商於逆賊接壤處所將
硫黃焰硝等物販賣與賊不論官兵民人皆拏
問治罪妻子家口入官該管官知情故縱者以
同謀論亦拏問治罪其不知情者州縣官革職
提問府道各降五級調用總督巡撫降三級畱
任將鹽布等物販賣與賊者販賣之人及知情

故縱之該管官皆照販賣硝磺例治罪其不知情者州縣官革職府道各降三級調用總督巡撫降一級畱任若將由本汛販賣之人盤獲其該管文武各官皆免罪拏獲之官議敘十名以上者紀錄一次二十名以上紀錄二次三十名以上紀錄三次四十名以上紀錄四次五十名以上加一級百名以上者加二級若不繫本汛地方於別汛盤獲販賣之人十名以下者紀錄

一次十名以上者加一級二十名以上加二級三十名以上加三級四十名以上加四級五十名以上者不論俸滿先行升用百名以上者越升一級卽用至於盤獲一人審時供出夥黨繫由捉獲犯人審出該管官免治罪倘若誣拏良民將誣拏之人照律反坐○又議準違禁將焰硝硫黃軍器等物私載在船出洋貿易者仍照例處分防守地方該管官員通同知情縱放者

亦照律治罪如不知情者專汛官革職兼轄官降四級調用統轄官降二級畱任督撫降一級畱任。二十三年題準山東江南浙江廣東各海口除夾帶違禁貨物仍照例治罪外商民人等有欲出洋貿易者呈明地方官登記姓名取具保結給發執照將船身烙號刊名令守口官弁察驗準其出入貿易。三十三年議準內地商人往外國貿易原坐去船損壞更換船來者

到關時稟明地方官並海關監督驗看相符準
其進關如坐去船不曾損壞竟造船帶來或暗
帶外國之人偷買違禁之物者海關監督並防
守海口地方官不行察出皆降一級調用○四
十二年覆準出洋漁船止許用單桅樑頭不得
過一丈舵水人等不得過二十名取魚不得越
出本省境界未造船時先行具呈州縣該州縣
詢供確實取具澳甲戶族里長鄰右當堂畫押

保結方許成造完報縣驗明印烙字號姓名
然後給照其照內仍將船戶舵水年貌籍貫開
列以便汛口地方官弁察驗如有違例將給照
之州縣降二級調用加級紀錄不準抵銷船戶
舵水人等如有越數多帶或詭名頂替者汛口
文武官員盤察不實亦降二級調用內有夾帶
焰硝硫黃釘鐵樟板等物接濟姦匪者其取結
之州縣官汛口盤察之文武官弁皆革職如繫

賣放者革職杖一百流二千里其內港取魚五六人之小船不在此例。又覆準商賈船許用雙桅其樑頭不得過一丈八尺舵水人等不得過二十八名其一丈六七尺樑頭者不得過二十四名一丈四五尺樑頭者不得過十六名一丈二三尺樑頭者不得過十四名於未造船時亦具呈該州縣取供嚴察確繫殷實良民親身出洋船戶取具澳甲里族各長並鄰右當堂畫

押保結然後準其成造造完該州縣親驗烙號刊名然後給照照內將在船之人詳開年貌履歷籍貫以備汛口察驗其有樑頭過限並多帶人數詭名頂替以及汛口盤察不實賣放者罪名處分皆照漁船加一等惟夾帶違禁接濟物件其罪名處分與漁船一例其有謀利之富民自造商船租與他人及寒薄無賴之人租船者失察之州縣官罰俸一年明知造船受租而容

其造者降二級調用又如隔縣別府外省之人
欲造船者必於各該本縣呈明察實該縣具印
結申詳督撫轉飭沿海造船之地方州縣成造
仍照例察驗舵水槓棋刊烙號數姓名其違犯
之罪名處分皆照商漁船一例遵行如有不遵
例報官私自偷造者失察之州縣汛口各官降
一級調用○五十一年覆準內地往臺灣之人
該縣給發照單如地方官濫給往臺灣照單經

該督撫題叅一次者罰俸六月二次者罰俸一年三次者降一級畱任四次者降一級調用如有良民情願入臺籍居住者令臺灣府縣察明出具印文移付內地府縣知照該縣申報海道稽察仍令報明該督撫存案若臺灣府廳縣官不行察明以致姦宄叢雜居住經該督撫察出題叅照隱諱例議處。又議準姦匪船隻出入口海口若遇失事將守口官罰俸一年至盜從外

洋竊發原非守口官所能越汛稽察遇有失事發覺咎在分巡委巡將守口官免議至外洋行劫之後散黨登岸濶冒入口守口官失於覺察者仍照定例罰俸一年其有盜由海口以內奪船偷越出洋遇有失事發覺卽將失察守口各官皆照海洋失事初叅例降一級畱任本案內如有逸盜勒限一年緝拏全獲準其開復限滿不獲照所降之級調用若本案已無逸盜定以

三年有能拏獲別汛姦船以及本汛並無失事者皆令該督撫察明具題到日亦一例準其開復。五十三年覆準漁船出洋不許裝載米酒進口亦不許裝載貨物違者嚴加治罪其守口各官不行盤察者照失察姦船出入海口例罰俸一年。五十五年覆準凡內洋失事專兼各官仍照內地盜案定例處分若果繫外洋被劫難定專汛兼轄應將文職免其處分倘繫內洋

失事捏稱外洋後被事主告發或察出之日將專兼各官皆照諱盜例處分既經事主告發該管督撫若不察明據實揭報題叅者照徇庇例議處○五十九年覆準沿海各省出洋商船礮械軍器槩行禁止攜帶如地方官不嚴察禁止致商船仍行私帶者照失察烏槍例罰俸一年○雍正五年覆準山東民人往奉天貿易及奉天民人有過海者凡船出口入口該州縣給與

印票將客人姓名貨物及賣貨地方同船戶水
手姓名開載票內守口官驗明掛號放行其往
奉天傭工人等該州縣察明姓名年貌籍貫給
與印票方許航海俟到卸船地方守口官驗對
印票年貌相符者準其入口同時該地方官於
原領票內鈐印令其帶回本地方察覈如貿易
傭工人等並無印票或與票內年貌未符及兵
役人等刁難勒索者守口官自行察出者免議

如有疎縱等情降二級調用。○七年議準每年沿海各汛出巡之後督撫不時密加體訪倘遇洋面失事文武官弁如有恐嚇賄囑不行通報情弊該督撫訪實題叅照諱盜例議處。○又議準拏獲偷渡過臺人犯問明從何處開船將失察水汛及本地文武各官照失察姦船出入海口例罰俸一年如文武衙門隱匿不報者或被告發或被上司察叅將該管之兼專文武各官

皆照諱盜例分別議處。○八年覆準如有將黃金販賣出洋者照鐵貨銅錢等物私出外境下海律治罪。其督關守口官弁受賄故縱者與犯人同罪。失於覺察者照律叅處。若官弁兵役藉端畱難抑勒商民者察叅議處分別治罪。○九年

諭據廣東布政使奏稱鐵器一項所關綦重不許出境貨賣律有明禁乃粵東地方出產鐵鍋凡洋船貨買

向未禁止臣到任後檢察案冊見雍正七八九年造報夷船出口冊內每船所買鐵鍋少者自一百連至二三百連不等多者買至五百連並有至千連者按鐵鍋一連大者二箇小者四五六箇每連約重二十斤不等百連約重二千餘斤如一船帶至五百連約重萬斤帶至千連約重二萬斤計算每年出洋之鐵為數甚多誠有關係請嗣後此項鐵鍋應照廢鐵之例一例嚴禁毋論漢夷船槩不許貨賣出洋違者該

商船戶人等卽照細載廢鐵出洋之例治罪官役通同徇縱亦照徇縱廢鐵例議處凡遇洋船出口仍交與海關監督一例稽察至於商船每日煮食之鍋仍照舊置用官役不得藉端勒索滋擾如此則外洋之鐵不致日積日多於防姦杜弊之道似有裨益至煮食器具銅鍋沙鍋皆屬可用非必盡需鐵鍋亦無不便外夷之處於朝廷柔懷遠人之德意原無違碍等語尺鐵不許出洋例有明禁而廣東夷船每年收買

鐵鍋甚多則與出洋之功令不符矣所奏甚是嗣後稽察禁止及官員處分商人船戶治罪之處悉照所請行倘地方官弁視爲具文奉行不力經朕訪聞或別經發覺定行從重議處粵東旣行察禁則他省洋船出口之處亦當一體遵行著該部通行曉諭永著爲例欽此○十二年覆準商人置貨販洋由本籍地方取結給照其中小本商民請照而往迨從外番貿易回至內地復欲奔回本籍請照程塗稍

遠勢所不及又有已在本籍請照到廈其報配之船業至滿載欲搭別船因照違碍廢時守候於小商多有不便飭令廈防廳察明此等情節卽取具行戶船主保結準其赴廳請給印照前往該廳將給照原由一面行知該地方官其請照各商仍俟回棹之日赴廳銷單如該廳有朦濶給照令該督撫嚴察題叅將該廳照盤察商船不實給照例降三級調用如該廳胥役有勒

索等弊亦令該督撫分別知情失察題叅將該
廳照衙役犯贓例分別議處其該船舵水貨客
回棹之日或有在番地因賬目不清及別項事
故者仍照例取具同鄉鄰船客商水手等甘結
報明廈防廳移文該地方官存案下期回日報
銷。又覆準海洋重地非內地可比該汛地方
文武官弁拏獲偷渡外番十名以上者專管官
紀錄一次兼轄官毋庸議敘二十名以上者專

管官準其紀錄二次兼轄官準其紀錄一次三十名以上者專管官準其加一級兼轄官準其紀錄二次四十名以上者專管官準其加二級兼轄官準其紀錄三次五十名以上者專管官準其以應升之官卽用兼轄官準其加一級倘不實力稽察以致疎縱十名以上者專管官罰俸一年兼轄官免議二十名以上者專管官降一級畱任兼轄官罰俸六月三十名以上者專

管官降二級畱任兼轄官罰俸一年四十名以
上者專管官降三級畱任兼轄官降一級畱任
五十名以上者專管官降一級調用兼轄官降
二級畱任至官弁兵役如有隱徇賄縱該督撫
分別嚴叅治罪其各官弁有降級畱任之案倘
能別案拏獲按其拏獲名數抵銷如三年內並
無過犯稽察嚴密本汛內果能肅清令該督撫
提鎮察明保題準其開復若有偷渡人犯希冀

開復捏飾諱隱一經發覺題叅交部議處該督撫提鎮不行詳察瀕行保題者亦交部議處○

十三年覆準東省豆船並無印票裝運出口及有匿票私賣與原票不符一經察出根究明確販豆人等按律分別治罪該管官不行詳察致有偷漏私越情弊別經發覺照失察姦船出入口海口例罰俸一年仍令該督撫不時稽察如有藉稱給票驗票名色勒索畱難苦累商民等情

卽行指名叅處○乾隆元年覆準各處汛口官
嚴詰販米出海如有地棍姦牙將米穀偷運出
口及在洋接濟姦匪者該管文武各官除通同
受賄知情故縱仍照違禁貨物出口律治罪外
如或巡察懈弛及偷越各處汛口後經別汛拏
獲審明失察偷運米百石以上穀二百石以上
者將各該官弁皆降一級畱任米百石以下穀
二百石以下罰俸一年米不及十石穀不及二

十石者罰俸六月○又議準船戶貪圖獲利在沿海地方私攬無照之人裝載偷渡過臺該地方文武官弁失於覺察者照失察姦船出入海口例議處如有意隱匿不報照諱盜例議處○二年議準過臺商船舵水人等令原籍州縣官將各該舵水年貌鄉貫填明照中或因有事別雇就地給單填注取具船戶行保甘結汛口各官驗明放行臺地各官仿照內地設立十家牌

填注實在籍貫人口確數並作何生理遇有事
故一例開除每月出具並無招攬游民結狀報
明所司察覈如有違碍一經發覺將出結船戶
人等照例治罪不行實力稽察之地方各官該
督撫察明叅送到日照失察偷渡例分別議處
○五年覆準沿海關汛所有文武官弁巡察掛
號之處嚴行飭禁不許藉端需索故意畱難如
有此等情弊卽行察叅將守口官弁照衙役犯

贓例分別議處如守口官弁藉端畱難抑勒苦累商民別經發覺將守口官弁照藉端抑勒例降二級調用該督撫提鎮失於覺察罰俸一年○十三年覆準雜糧麥豆偷運出洋接濟姦匪者其文武官弁失察故縱處分皆照偷運米穀出洋定例處分○十四年覆準商民出洋貨物一應銅器廢銅皆嚴行禁止不許攜帶各洋貨賣如將紅銅黃銅私販各洋貨賣其關汛文武

官弁不行搜檢察拏知情故縱者皆照出洋漁船夾帶硝黃釘鐵等物汛口之文武官弁革職例革職如繫賣放者照例革職治罪若止於失察者降一級調用○十九年覆準各省商漁船在洋除實繫搶奪並未劫盜者仍照搶奪辦理外如有盜劫之案溷以搶奪具報希圖規避處分者將捏報之文武各官照諱盜爲竊例革職

欽定大清會典則例卷二十四

欽定四庫全書

史部

欽定大清會典則例卷二十五

詳校官檢討_臣劉 炳

編修_臣程嘉謨覆勘

總校官原任中允_臣王燕緒

校對官中書_臣呂雲棟

謄錄監生_臣王元弼

欽定四庫全書

欽定大清會典則例卷二十五

吏部

考功清吏司

斷獄

一用刑違式順治十八年議準凡問刑衙門於
獄內用桺牀者革職交部治罪○康熙九年題
準官員將犯人除夾棍拶指之外別用非刑者

革職如將婦女用夾棍者亦革職該管上司不
察實具報者降二級調用督撫不行題叅者降
一級畱任犯婦有孕亦不得用拶指違者降一
級調用該管上司不察實具報者罰俸一年督
撫罰俸六月又官員將旗人擅自夾責者降一
級調用○又題準官員將絞罪犯人誤斬者降
二級調用將應監候秋決正法人犯即行正法
者降四級調用如將立決人犯於停刑之日違

例處決者罰俸六月○十一年議準審問小事
不準用夾棍內外審事官員若將應夾案內罪
不致死之人被夾即死者罰俸一年將不應夾
訊之人擅行夾訊者降一級畱任被夾之人即
死者降三級調用恣意疊夾致死者革職若有
別項情由照情由議罪若將不應夾訊之人回
堂行夾堂官不行詳慎輕聽夾訊者罰俸六月
○十四年奏準官員將監禁重犯秋審不行解

送或已經解送道路遲延以致秋決愆期者府州縣官降一級調用司道罰俸一年督撫罰俸六月○四十五年覆準五城副指揮吏目除逃人盜案照舊管理外其一切民辭非奉御史批發正印官移行不得即行準理動用刑法倘有擅準民辭及拘禁濫刑縱役索詐等弊照例議處○雍正七年議準各省督撫設立印簿分發各問刑衙門將某案某人因何事用夾刑及用

刑次數逐細填注簿內於年終申繳督撫衙門
詳察若有濫用夾棍及用多報少情弊察出指
叅將濫用夾棍之員照將不應夾之人行夾例
降一級畱任將用多報少之員照朦溷造冊例
降一級調用○十一年議準凡姦匪將各種避
刑邪術私相傳授學習者地方官不行察拏照
不禁止邪教例降一級調用○乾隆元年議準
凡內外問刑衙門所用刑具務皆按照定例式

樣製造其在外各省州縣令該管道府遇赴州縣盤察時將所用刑具詳加察驗倘有違例造用者即詳揭題叅將州縣官照擅用非刑例革職如道府不行詳揭發覺一并題叅將道府照不察實具報例降二級調用督撫失於察叅經科道糾叅將督撫照失於覺察例罰俸一年如道府已經詳揭而該督撫徇隱不行叅奏者將督撫照徇情例降二級調用在京衙門如有不

遵定例式樣任意造用者將用刑官照州縣例
議處該管官失於察叅者照督撫例罰俸一年
如該管官明知徇隱不行察叅者亦照徇情例
處分至強盜及十惡謀殺故殺等案重犯仍照
例用鐵鎖扭鐐各三道其餘鬪毆人命等案罪
犯以及軍流徒罪等犯皆止用鐵鎖扭鐐各一
道笞杖等犯止用鐵鎖倘有違例濫用即行題
叅交部議處

一

京城承審事件順治初年定刑部見審案內如繫杖枷等罪限十日完結發遣軍犯等罪應入彙題者限二十日完結命盜等案應會同三法司審理者限三十日完結如案內有應行提質人犯準其傳提到案之日扣限若正犯患病準以病愈之日扣限倘該司官任意因循或三法司官員不即會審以致逾限其承審司官及會審

遲延之員令該堂官察明分別交部照例議處
再見審案件審結之日除應行監禁人犯照例
監禁外餘皆即行發落倘有遲延不行發落以
致人犯淹禁書役作弊者除書役照例治罪外
承審之該司官亦交部議處○康熙三十二年
議準凡行提控告案內人犯咨行八旗並總管
內務府行提於文到之日即行送部若越二日
不行送部者將該管官交部議處若行提莊屯

居住人等及行直隸府州縣等處提人者每日
定限五十里以文到五日内起解若不照限申
解將該管官題叅或有別故詳開報部其到部
事件在

京畿地內者限一月審結在外者以被證到齊日
為始限一月審結如有內外移咨詢問者以回
文到日為始若刑部司官將應速結案件不行
完結故意推諉遲延者堂官指名題叅交部議

處○雍正元年議準凡見審事件其人文送部
毋須又提犯證者限十日內說堂完結其提人
質審四五日內到部毋庸會審者限半月內說
堂完結若必須提人質審並三法司會審仍照
定例一月限內完結○又覆準五城司坊案件
隨到隨審定限五日內完結詳報其巡城案件
扣限十日內完結造冊送都察院察覈注銷若
不每日進署將案件叢積遲延不於限內完結

照

欽部事件遲延例分別議處或有縱容衙役濶行訛詐等事一經察出或被受害人首告照衙役犯贓例分別議處○又奏準司坊職守人命案件指揮管理竊盜案件副指揮吏目按地分理遇有屍親事主稟報者該司官即行收受一面詳報該城一面親往相驗踏勘其本案人犯即行拏審解院不得遲延時刻如有推諉遲延以致

賊犯潛逃及藉端滋事拖累平民等弊即將該
司坊官照例叅處其逃人土娼亦宜責該坊官
按地分察一經告發準其收受緝拏至賭博打
架則繫議明應管之事嗣後五城御史及該司
坊官所屬地方有毆賭等件固宜隨拏隨審即
別城隔屬塗行夜宿但遇酗酒罵街角口打架
開場賭錢小絡竊物等事隨見隨拏移交該管
衙門審理不得以地非所屬過而不問至民間

一切辭訟仍遵定例不許擅受皆歸該城御史衙門審理○五年議準前三門內五城分管地方除相驗人命及鬪毆活傷驗報不實等案仍將該管之各該司坊官照例叅處外其賭博逃盜等案均免司坊官失察處分○七年議準戶部八旗司審理旗民房地家產主僕爭告之案亦照刑部見審之例限一月內完結如限內不完將承審官員照

欽件違限例議處如有提人移詢之處竢人文到日
扣限○又議準秋審

朝審九卿詹事科道務必每日到班若有要緊公
事及偶有疾病不能到班者豫行知會將該員
未到會審之省分事件不必列名每遇審期都
察院委滿漢御史各一人稽察有無故不到者
指名題叅照推諉事件例罰俸一年○八年

諭兩三處衙門會議會審之案若一處曾經行催而他

處尚不辦理即著行催之衙門具摺奏聞將來遲誤處分之時免其議處倘曾經行催而未奏聞者日後因遲延議處仍將該衙門一并交議倘奏聞之後以爲既經具奏此後遲延與已無涉以致事件仍復擔閣者亦將該衙門一并議處著通行各旗各部院衙門知之欽此○十三年奏準刑部凡有題咨案件其細小事情駁正者毋庸置議如各省將應擬重罪人犯竟令脫網或無辜之人羅織擬罪刑部

司官細心察覈駁行覆審果得實情者於呈堂行文之時即將定案司官注册俟改正後於每年十二月具題交部議敘每一案紀錄二次○乾隆四年奏準凡旗人爭控戶口田房等事於各該旗具呈該旗察明冊籍訊明證左出具印甘各結將人文一并咨送戶部詳審定擬完結如旗人控告民人者亦令於各該旗具呈民人控告旗人者即令於各該地方官處具呈令該

管官取具原告確供並出具印甘各結轉詳咨
送戶部轉行被告之該管官秉公取具被告確
供亦令出具印甘各結轉詳咨部戶部詳覈兩
造確供分別曲直斷理完結如兩造匿情不吐
彼此互異礙難斷理者即行提審會同刑部嚴
訊定議其中或有因地畝界址不清必須兩造
親身履畝互相勘對方能明晰者再將旗人押
發州縣令該地方官會同該理事廳審明報部

完結以上控告戶口田房等事文移往返八旗
咨文定限於一月內覆部直隸咨文定限於兩
月內覆部如有逾限之處戶部取其職名咨送
本部兵部覈叅照

欽部事件遲延例議處如該管官有抑勒徇隱等弊
許受屈之人據實聲明赴部控告戶部會同刑
部嚴提審訊或繫該管官有意抑勒瞻徇抑或
扶同依附之處察明叅奏將有意抑勒瞻徇及

扶同依附之員皆照會審事件偏袒不公例降
二級調用若並無冤抑妄行控告者按其所誣
情節交送刑部治罪○十八年

諭刑部議駁外省題達案件經督撫遵駁改正者司
官得並邀議敘夫指駁案情必有首先立議之人
乃將各官通行議敘其中隨同畫稿並學習額外
之員均得濫邀敘錄非覈實之道且由刑曹升調
別衙門者恃有加級紀錄可以抵銷往往不肯認

真勉力辦事因思吏部司官向因議處之案較多
別部僅將承辦之滿漢司官各一人開送議處此
雖非正例然以吏部議罰可以通刑部議敘其於
考課之法方為平允嗣後刑部各司遇有因題駁
議敘者著照此旨行欽此

一外省承審事件雍正五年奏準官員承審事

件命案限六月盜案限一年

乾隆十五年奏準
盜案改限十月

欽部事件限四月發塚搶奪竊賊事件皆限六月

乾隆

十五年奏準
其餘案件一切未經定有限期者
皆改限四月

皆扣限六月完結

乾隆十五年奏
準皆改限四月

皆以人犯到

案之日起限如有隔屬提人及行文詢問者以

人文到日起限奉部交審事件以州縣奉文之

日起限○又奏準凡承審

欽部一切事件其四月限者州縣限兩月解府州府

州限一月解司司限二十日解督撫

乾隆十年
奏準改四

月限者府州改限二十日解司
督撫以二十日分別題咨完結

命案六月限者

州縣限三月解府州府州限一月半解司司限

一月解督撫

乾隆十五年奏準六月限者府州改限一月解司督撫限一月分別

題咨盜案一年限者州縣限七月解府州府州

限兩月解司司限一月半解督撫

乾隆十五年奏準盜案改

限十月州縣改限五月解府州督撫限以一月半分別題咨完結

○又議準承

審命盜

欽部事件二叅限期亦令州縣限兩月解府州府州

限一月解司司限二十日解督撫如逾此分限

不能完結繫何官遲延該督撫察明題叅即將

何官照易結不結例議處

乾隆十五年奏準府州改限二十日解司

督撫限二十日分別題咨完結

○又奏準按察使司自理事件

限一月完結府州縣自理事件限二十日審結

上司批審事務限一月審報如有遲延該督撫

察叅○又奏準官員審理命盜

欽部案件如案內正犯及要證未獲情辭未得確實

及等候提拏犯證或因隔省行察限內實難完

結者承問官將此等情由申詳督撫題明展限
至各省關取盜案口供或點盜不吐實供希圖
延案嗣後如有關取必須時日者詳該地方官
申詳督撫咨部展限○又議準各省苗疆及邊
遠地方官審理一切

欽部命盜案件其初限準展限兩月續叅之四月亦
照初叅展限兩月以通解府解司日期黔省分
駐苗疆之州同州判承審案件由州解府者初

叅覆叅均準其於展限兩月之外再展限一月

展限兩月者州縣展限一月府州展限一月展限三月者州同州判展限一月府州各展限一

月○又覆準官員審理事件將人犯審解除臺

灣瓊州各省苗疆已經定有展限之例者不準

扣除程塗日期外其直省各州縣應覈明各州

縣至府州府州至省水陸程塗里數先行造冊

報部存案各州縣將人犯招解每日限行五十

里遇有案件遲延與原定道里日期相符者令

該督撫於限滿察叅時聲明免其議處如解役
中塗逗遛者除原限日期外仍不準扣除○又
議準地方案件有二限必不能完結者許該督
撫於二叅限滿題叅時即將難結緣由疏內聲
明將承審各官革職畱任再限四月審結如再
不能審結題叅革任其應易結事件不得涵行
題請展限仍照舊例遵行○又奏準承審事件
初叅二叅限內如州縣已經招解上司將屬官

解到日期故為改遲或苛駁以致遲延許受抑
屬官詳報督撫據實題叅將故改日期上司照
推諉事件例議處苛駁上司照事件應結而故
為駁詰例議處屬官免議○又議準州縣審理
案件於二叅限滿不結後無論難結易結將該
管之府州職名一并開叅如繫難結案件承審
之州縣議以革職畱任者將揭報之知府直隸
州知州罰俸一年如繫易結不結承審之州縣

議以革職並三限不能審結議以革任者將揭
報之知府直隸州知州降一級畱任如州縣官
承審案件玩延不結知府直隸州知州並不揭
報應照徇庇例降三級調用其知府直隸州知
州自行審理案件督催之道員皆照知府例分
別議處至按察使為刑名之總匯事務繁多一
時難以稽察應準揭叅免議如有並非難結案
件該管府州捏飾難結緣由朦溷詳請展限者

令臬司察覈揭叅將扶同捏飾之該管府州皆
照易結不結例革職若臬司不行察出揭叅據
詳率轉經督撫察出將按察使照徇庇例議處
若督撫將違限各官徇情不行題叅察出一并
議處至承審二次限內除升遷事故並差委緊
要軍務事件許令委官署理外若承審官夤緣
卸事照規避例革職原委之督撫上司各官照
徇庇例各降三級調用○八年議準每歲農忙

之期例應停訟凡州縣官戶婚田土等案務於
農忙停訟之前逐一審結倘有應加覆覈者暫
將兩造釋歸農業具詳各上司俟農隙之時仍
照例扣限審結○十二年覆準州縣自理戶婚
田土等項案件限二十日完結者各設立循環
簿於每月底將準告審結事件填注簿內開明
已未完結緣由其有應行展限及覆審者亦即
於冊內注明送該管知府直隸州知州察覈循

環輪流注銷竣歲終該道府直隸州將所屬並
無違限通詳督撫藩臬衙門存案倘有違限不
行審結者詳請咨叅照遲延不結例議處或道
府直隸州申報不實照不行詳察例罰俸六月
其州縣官委佐貳雜職審勘者亦照不行詳察
例罰俸六月若州縣所送冊內有朦溷造報者
照朦溷造冊例議處遺漏少報者照造冊遺漏
例議處○乾隆四年奏準各省辦理一切事件

務照定例扣限審結如有實在應行展限緣由該上司亦必確實覈明具題展限不得仍前任意扣展以杜藉辭延閣之弊倘該上司不恪遵定例嚴加察覈任意扣展限期察出除將承辦官照例議處不準扣限外仍照濫詳展限例將轉詳之司道府並直隸州等官各降一級畱任督撫罰俸一年○五年覆準承審命盜

欽部案件州縣府司仍照定例分限審解該督撫將

州縣府司起解年月日期於疏內聲明以便察覈其正限內完結之案逾分限一月以上者罰

俸一年逾分限不及一月者罰俸三月

州縣府司皆照

此例處分

其督撫如有遲延照例計月處分若正限

之內州縣官不能審結該督撫即將遲延之員

咨叅到部或限內並逾限不及一月者罰俸三

月逾限一月以上者罰俸一年即於限滿之日

接扣二叅限期○又覆準官員承審案件遇有

事故離任新任署事接審州縣官如前官承審未及一月者準其按審過日期扣明展限一月以上離任者準其展限一月其分限事件前官承審扣限過半離任者準其扣半加展如前官於二叅限內離任者接審官準其以到任之日起扣限四月審結按照承審官例察叅其督撫司道直隸州新任之員如屬官尚未經招解者仍照應得分限招解題結如已經招解前官遺

交辦理者亦準照應得分限扣半加展其展限
各官皆照定限審結不得再起限期如逾限未
行審解該督撫分晰察叅按照定例分別議處
○六年覆準地方案件原問官審斷未當固執
成見必應改委別員承審者將應行改委改限
緣由確切聲明如上司明知屬官例限將屆故
為別委希圖展限者將別委之上司照徇庇例
議處至案件發審之初即委員會審並部駁別

委賢員審擬之案準以該委員奉文之日照例
扣限審結附招聲明毋庸別行咨題○七年議
準承審案件如印官有撲捕蝗蝻勘災監振並
奉調入闡檄委會審會勘以及察河防險鄰邑
相驗等事公出槩準其於本限內扣除該督撫
於咨內聲明以憑覈議其委署別邑之員本任
內應審之事仍照原限覆叅不準照公出之例
扣展再該管之道府廳員如承審案件屬官已

經審解該管上司遇有公出照州縣之例扣展
○九年議準州縣官承審案件除衆證明確即
應速為審擬依限轉解不得故延外如果正當
招解之時案內正犯或緊要證左染患沉疴承
審官即將患病日期及所患病症報明該管上
司該上司即委官驗看患病屬實即撥醫調治
取具醫生刑禁人等甘結承審官及委官加具
印結詳報該管府州覈明加結詳送撫司備案

俟該犯病愈之日起解其該犯病痊後承審官
有無報愈遲延亦責令府州實力稽察報明銷
案其患病日期準於原限內扣除至府州審轉
案件有犯證患病者結報該管道員稽察屬實
加結覈轉再司道審轉之時或遇犯證患病亦
報明該管上司委官驗看取結詳報皆準其扣
除若承審官及審轉之府州司道將人犯帶病
起解以致中塗病斃者照解犯中塗患病不行

留養例死一二名者罰俸一年三四名者降一級留任五六名者降二級調用若無故遲延捏報患病及病已全愈而遲延不報希圖扣限者照無故遲延例革職委官及各上司通同徇隱者照徇庇例降三級調用

一官員斷獄不當康熙九年題準官員將承問人犯以應擬斬絞人犯而錯擬凌遲應秋後處決人犯而錯擬立決者府州縣官降一級調用

司道罰俸一年督撫罰俸六月如將軍流等罪
錯擬凌遲者府州縣官降四級調用司道降二
級調用督撫降一級調用如將軍流等罪錯擬
斬絞者府州縣官降三級調用司道降二級調
用督撫降一級畱任如將應絞人犯擬斬及將
軍流等罪以下錯擬失入者令該部改正承問
官免議如錯擬已決者承問官革職司道降四
級調用督撫降三級調用如將無罪之人擬決

者亦照此處分其初審後審官員曾經定罪者
總一槩處分若承問官將應凌遲犯人錯擬斬
絞者府州縣官降一級調用司道督撫皆罰俸
一年如將應立決人犯擬為秋後處決者府州
縣官罰俸一年司道罰俸六月督撫罰俸三月
如將應凌遲人犯錯擬軍流等罪者府州縣官
降二級調用司道降一級調用督撫降一級畱
任如將應擬斬絞人犯錯擬軍流等罪者府州

縣官降一級調用司道罰俸一年督撫罰俸六月如將軍流等犯錯擬徒杖笞罪者府州縣官罰俸一年司道罰俸六月督撫罰俸三月如將有罪人犯不議罪竟免者亦照此定罪之輕重處分其將應斬人犯擬絞及軍流等罪以下錯擬失出者令該部改正承問官皆免議○又議準官員承審反叛人犯未經審出實情後經別官審出者將未經審出各官革職轉詳之司道

降四級調用未經察出之督撫降一級調用若將應取緊要口供不行取供者承問官降二級調用轉詳之司道降一級調用督撫罰俸一年如將斬絞人犯未經審出實情後經別官審出者將未經審出各官降一級調用轉詳之司道罰俸一年未經察出之督撫罰俸六月若將應取緊要口供不行取供者承問官罰俸一年司道罰俸六月督撫罰俸三月如將軍流等犯未

經審出實情後經別官審出者將未經審出各
官罰俸一年司道罰俸六月督撫罰俸三月如
將應取緊要口供不行取供者承問官罰俸六
月司道罰俸三月○又題準督撫將應行赦免
之斬絞人犯不與援免者降一級調用如將不
應赦免之斬絞人犯援免者罰俸一年將應行
赦免之軍流等犯不與援免者罰俸一年如將
不應赦免之軍流等犯援免者罰俸六月至官

員承問婪贓員役因遇

赦竟不提質即行完結者罰俸一年轉詳之司道罰俸六月督撫罰俸三月○又題準承問官錯擬罪名其正犯之罪應與赦免者將承問官免議○又題準督撫將重犯引律具題或擬重或擬輕曾經三法司兩議具題者將督撫並承問官皆免議○又題準官員擬罪將不應折贖之人違例折贖或將應折贖之人不行折贖者罰俸

六月○又題準官員承問婪贓人犯將原叅贓銀不行審出復經別官審出或本官審出之贓無幾又經別員審出多於前數者將未經審出之府州縣官降三級調用轉詳之司道降二級調用督撫降一級畱任如繫督撫題叅其該督撫免議如將審出贓銀私自刪改者革職○十四年奏準官員承問事件或將應追賠贓銀未斷追賠應給原主銀失斷給原主者罰俸一年

轉詳之上司罰俸六月○又奏準官員將應減
等人犯遺漏未經減等者罰俸一年轉詳之司
道罰俸六月督撫罰俸三月○又議準官員將
良民審為逃人將奴僕錯斷為主並以良家子
斷為奴僕者或將應革應降之人不議革降者
皆罰俸一年若將應承受家產之人不與承受
不應承受之人錯斷承受者或將不應革降之
人錯擬革降者皆罰俸六月若將未革職之官

即擬杖罪折贖等事並不敘功者皆罰俸兩月
○又奏準佐貳等官凡辭訟不許準理如正印
官批行事件方許審理如佐貳等官擅準辭狀
降一級調用正印官不行揭報罰俸一年如印
官將地方辭訟不行親審曲徇情面批發佐雜
者將印官照徇庇例降三級調用該管各上司
不行揭報降一級畱任督撫不行叅奏罰俸一
年再佐雜等官凡巡警捕盜以及倉庫驛站水

利等項其職分各有專司如繫伊專管之事應
行察勘者亦準印官批行辦理仍令不時稽察
或有營私差擾等弊立即揭報該督撫叅革照
律治罪若印官不行察叅亦照前定例議處至
或正印官公出及不同城之佐雜遇有竊盜賭
博等事許佐雜等拘拏隨即解送印官審理如
遲延不即解送者照解犯遲延例罰俸一年如
有濫差需索苦累情事正印官立即揭報照佐

貳官藉捕擾民例分別議處○又奏準官員審
事時容有罪之舉人等坐審者罰俸一年○二
十二年議準督撫糾叅貪婪官員務將所得實
贓年月家人衙役確注題叅倘督撫不行據實
糾叅及糾叅後不行據實審明仍照贓銀未經
審出例處分至承問官有將贓銀那移

赦前後者照贓銀私自刪改例革職○二十五年議
準大小衙門問刑官員將刑獄供招不行速結

無故遲延者將承審官革職無故將平人久禁
囹圄者亦革職因而致死及故勘致死者革職
交部治罪其改造口供故行出入者將承審官
革職擬以死罪已決者革職交刑部治罪其草
率定案證據無憑枉坐人罪者將承審官革職
○三十六年議準承審各官一應供招不許擅
自刪改其初取之供亦宜詳載揭帖若承問官
增減原供臬司依樣轉詳督撫不行覈叅朦溷

具題者各照例分別議處○三十七年覆準州
縣官之事其易結難結督撫知之最確若不令
督撫注明不分易結難結一遇違限之事人人
有革職之懼嗣後令督撫將易結不結情由詳
確注明題叅照例議處如督撫將易結之事以
為難結不行注明朦溷題叅者或經部察出易
結不結情由將該督撫照徇庇例處分○三十
九年題準各省捕役誣良為盜之案經該管官

覆加研審自行究出未經致死者免議致死者
降二級畱任至盜賊誣良承審各官初次不能
確審實情經上司駁飭自行改正或被上司審
出實情改正如已經致死者將承審之州縣官
降一級畱任未經致死者罰俸一年道府不能
詳察據招率轉經司駁飭始行改正或被上司
審出實情改正如已經致死者罰俸一年未經
致死者罰俸九月按察使不細心嚴鞫經督撫

駁飭始行改正或被審出實情改正如已經致死者罰俸九月未經致死者罰俸六月其不行察出具題之督撫經部駁始行改正如已經致死者罰俸六月未經致死者罰俸三月若州縣官膜視悠忽或經上司駁飭至再始行改正或被上司審出實情如已經致死者將承審之州縣官降二級調用未經致死者降一級調用道府不能詳察據詳率轉經司再駁始行改正或

被上司審出實情如已經致死者降一級調用
未經致死者降一級畱任按察使不細心嚴鞫
經督撫再駁始行改正或被審出實情如已經
致死者降一級畱任未經致死者罰俸一年不
行察出具題之督撫經部再駁始行改正如已
經致死者罰俸一年未經致死者罰俸六月若
州縣官自行審出與飭駁之上司皆照例免議
○五十二年議準凡違限初叅各官援

赦免議內有例限又滿仍未審結題叅其初叅之案
既經援免其復叅應照初叅例處分若未經遇
赦免議之初叅各官以遲延復叅者仍照復叅之例

議處○雍正元年議準刑部見審事件其承審
司分惟該司之滿漢司官承審該司之筆帖式
與書辦登記口供若容別司司官與筆帖式過
司同坐陽為閒聽當面遞話暗撥供情者將別
司司官筆帖式並容隱之承審司官皆照縱容

外人入獄走洩事情律議處各司審理事件有
應提審之人回堂提取審明後即回堂釋放若
情罪果有關繫喚同司獄到堂回明方準收禁
若有擅行拏禁釋放竟不回堂者察出將濫行
送監之司官並聽從收禁之司獄皆照應申上
而不申上律議處○三年議準凡謀叛謀反之
罪照律連坐籍沒其餘情罪詳載律內皆應照
律擬議不得存心陷害藉言情罪重大誣指朋

黨妄議株連父母兄弟妻子籍沒家產若承審官於本罪外捏造此等言語株連父母兄弟妻子籍沒家產者即照故人死罪律治罪○又奏準凡督撫具題事件內有情罪不協律例不符之處部駁再審該督撫虛心按律例改正具題將從前承審舛錯之處免其議處若駁至第三次督撫不酌量情罪改正仍執原擬具題部院覆覈其應改正者即行改正將承審各官該

督撫皆照失出失入例分別議處○又奏準凡將死罪人犯錯擬軍流等罪軍流等罪錯擬死罪者將承審錯擬官員仍照例議處至軍流等罪以下錯擬者該部即行改正槩免糾叅○又奏準承問官審理事件錯擬罪名不拘犯人之罪其錯擬官員遇

赦者應免議○又奏準凡遇各省

特差卹刑之時有審豁者原問官皆免追究○四年

遵

旨議定承審命盜各官如有誤定重罪草管人命被接
任官審出實情者將草管人命官革職永不敘
用審出實情官加一級○七年議準順天府所
屬州縣一切命盜事件定案後即解該管同知
覆審加看轉司如有扶同出入照知府例議處
○又議準有司官讞獄時用招房書吏照供錄
寫將所錄供辭當堂讀與兩造共聽果與所供

無異方令畫供該有司即將供辭帶入內衙親
自定豪傳喚經承繕寫不許攜至外廊倘各該
有司將所錄供辭不帶入內衙親自定豪以致
書吏得增刪改易者許被害人首告該督撫即
行題叅將該有司照承問官失入失出例分別
議處至凡供招內如字樣不合者承問官須照
依文義改正仍將改正之處聲明若有溷行書
寫不即改正者承問各官皆罰俸一年督撫罰

俸六月○又議準刑部各司審事時應令司務廳嚴行禁止家人衙役毋許肆詈罪人恐嚇索錢如有此等事發該管官照失察衙役例處分家人之主照約束不嚴例處分○十二年覆準凡會審事件如有偏袒遲延等弊許其通揭上司會叅約期不到者應照推諉例罰俸一年偏袒不公者應照徇情例降二級調用將事件遲延不結者應照事件遲延違限日期分別議處

○十三年議準兵丁為竊承審之文員將兵作民代為開脫照徇情例降二級調用○又覆準官員承審賭博人犯如已供出造賣之人該地方官希圖規避失察朦朧結案者或經上司察出或經別官審明將承審之員照失察製造賭具例革職如繫該犯狡辭支飾不將造賣之人據實供出承審之員亦不根究實情後經察出審明原承審官並無規避失察情事仍照不能

審出實情例按罪犯分別議處○又覆準衙役
犯贓內除致死人命贓至滿貫罪應論死者仍
按律例定擬外如有索詐貧民致令賣鬻男女
者即十兩以下亦照衙門蠹役恐嚇詐贓例治
罪至承審官將索詐實情審出故為更改避重
就輕將承審官照徇庇例議處○又覆準各衙
門承審案件除律例內應行提取婦女收禁照
例提訊其餘小事牽連婦女應提子姪兄弟代

審至如遇虧空追賠搜檢家產雜犯等案亦槩
不許提審婦女永行禁止倘官員陽奉陰違侮
辱婦女或經告發或經各該上司覺察照違制
律治罪倘各該上司有徇庇及失察等情一經
發覺并將各該上司分別議處○乾隆三年覆
準凡有贓贖銀無論內結外結飭令該地方官
先期出示將應納數目明白曉諭令各犯照數
交納如有胥役人等藉端苛索分肥者將胥役

人等照律分別治罪該管官知情故縱照縱役貪贓例革職若失於覺察照失察衙役犯贓例分別議處○四年覆準官員失察捕役誣竊為盜及將曾經犯竊之人指為見在強竊盜犯者承審官自行察出已經致死者將承審之州縣官降一級畱任未經致死者免議○五年奏準州縣官將應審理事件不即審究以致釀成人命降二級調用如不即審究以致遲延者照事

件遲延例議處○又奏準凡承問各官如徇私枉法顛倒是非故出故入情弊顯然者仍行指名叅處至於官員審理案件有情罪不協律例不符失出失入經上司察明駁令再審承審官虛心按律例改正免其糾叅若承審錯誤之員已經緣事離任無從改正後官遵駁定期改正或案件尚未招解離任經後官審出者令該督撫於咨題內聲明將從前之承審官一例免議

若上司飭駁之後承審官實繫錯誤固執原擬具詳經上司委別員審出改正或案件已經題咨完結後經察出者仍照失出失入例議處如委員逢迎遷就互有出入後經發覺亦應照例議處○六年議準凡地方呈辭未經在下控告輒赴院司道府控告者不得濫準如院司道府濫行準理照上司違例受理例議處○七年奏準問刑官員審理案件須確引一定律例按照

正律正例擬斷其有既引定例而又云不便照
此律此例治罪而更議長其罪及律例本有正
條問刑之官不引正律正例深刻定罪者該部
即行改正引律例定罪將更定重罪之員依故
入律定擬○又題準凡斬絞重犯如有以次成
丁而稱為無捏報畱養者該管官不行察明遽
出印結將出結之官降三級調用轉報之上司
降一級畱任督撫罰俸一年若地方官出結後

上司復令察出或原官察出據實首送準照檢
舉定例辦理○十五年覆準凡上司委官覆審
事件如審出原問官有徇私枉法顛倒是非故
出故入等弊仍照定例處分外其有供情疎漏
或援引拘泥實出無心之誤後經委員改正者
照審處錯誤例罰俸一年

提解

一提解人犯康熙九年題準凡軍流徒罪發遣

人犯或應本省發配或應解部發遣均以部文到日為始定限兩月起解路塗解送每日定限五十里如兩月內不速行發解者罰俸一年過一年者降一級調用未經行催之上司罰俸半年或將此等人犯兩月內不行發解以致斃獄者降一級調用將未經行催上司罰俸一年至各省審結案內應行解部之入官人口家產亦立限兩月自該省起解其解送人役亦定行程

限期違者題叅若官員將應解人犯錯解別處者罰俸六月○又題準凡叛逆人犯及斬絞流徒笞杖等犯原解未交之先塗路脫逃者皆將原地方該管各官議處其起解之犯已經交與該府州縣脫逃者原地方官免議將承接府州縣該管各官議處其斬絞重犯不加肘鎖少差解役以致脫逃者降一級調用如軍流徒罪等犯不加肘鎖少差解役以致脫逃者罰俸一年

逃犯皆照案緝拏如所差解役得重犯賄賂縱
脫者將本官照衙役犯贓失於覺察例議處○
十四年議準官員將未經題結之軍流等犯先
行發遣者降一級畱任○又議準官員將軍流
徒罪人犯令人取保脫逃者降一級調用或該
犯私回不行察出者罰俸一年如笞杖人犯脫
逃者罰俸六月再官員如給軍流人犯出關印
文或給執照者降四級調用○二十五年議準

凡軍流徒犯及免死減等流犯有祖父母父母
老疾無倚家無以次成丁者如繫大宛兩縣民
人該縣出結府尹確察報部如屬五城民人掌
印兵馬司指揮出結巡城御史確察報部如屬
外省民人州縣官出結司道府官轉詳督撫督
撫確察報部如並無年老祖父母父母而稱為
有實有以次成丁者而稱為無該管官不行察
明出具印結將出結之官降二級調用轉詳之

上司罰俸一年督撫罰俸六月如有此等人犯
用財行賄出具印結將出結之官革職提問轉
詳之上司降三級調用督撫降一級畱任兵馬
司照州縣例議處巡城御史順天府府尹照督
撫例議處若地方官出結後上司復令察出或
原官察出據實首送者免議○雍正二年議準
外省解犯及解京與京發之犯其情罪重大者
於批牌之上注明此繫要犯應令官弁管押遞

送字樣即從首先接遞處該千總等親身押送
出境交代取收管存案若該州縣無設防之武
弁則令吏目典史親身押送出境交代皆於取
獲收管內注明某官某弁送交倘有疎虞該撫
題叅黜革其尋常解犯仍照定例選差押送○
又議準凡奉

旨緝拏之重犯各省督撫及地方官務須嚴行緝拏
解部如果所屬地方無獲亦並無人隱藏地方

官於年終申報督撫奏

聞仍令地方官出具印結報部存案若該地方官出
具印結後被旁人首獲審出曾在某處隱藏某
家將出具印結之該地方官革職知府直隸州
知州降二級調用道員罰俸一年巡撫罰俸九
月所有加級紀錄槩不準抵銷若該地方各官
未出具印結之前如有隱藏被旁人首告拏獲
者將該管地方官降二級調用知府直隸州知

州罰俸一年道員罰俸九月巡撫罰俸六月所有加級紀錄亦不準抵銷如該管各官知情聽其隱藏者與罪人一例治罪如奉

旨緝拏重犯該地方官盡心拏獲一名者即準加一級○三年議準凡有斬絞重犯州縣官已加肘鎖多差解役脫逃者降一級限一年督緝限內全獲準其開復逾限不獲照所降之級調用至軍流徒罪等犯如已加肘鎖多差解役脫逃者

罰俸六月逃犯皆照案緝拏○又議準凡知府及直隸州知州所屬州縣若山海巨盜斬絞重犯中塗脫逃有一二案者罰俸九月三四案者罰俸一年五六案以上者降一級限一年催緝限內全獲準其開復逾限不獲照所降之級調用若笞杖徒流等犯中塗脫逃有一二案者罰俸三月三四案者罰俸六月五六案以上者住俸限一年催緝限內全獲準其開復逾限不獲

降一級畱任仍照案緝拏○又奏準發回原籍
安插並流徙充軍等犯有在中塗患病者即著
該管地方官畱養醫治內有隨行親屬病者亦
準畱養疾病痊起解將患病日期報部如不畱
養醫治以致病故一二名者將該地方官罰俸
一年三四名降一級畱任五六名以上降二級
調用至凡解部及遞解外省人犯中塗患病原
解即報該地方官驗明委繫患病出具印結如

取結後病斃者其官役免議未取患病印結塗
中斃一二名者將僉差之官罰俸一年三四名
降一級畱任五六名以上降二級調用○四年
議準滿洲蒙古漢軍之家奴犯軍流罪者止將
本身發遣令該督撫酌發有駐汛弁兵之處給
與兵丁為奴若發遣處將犯人疎脫者該管官
照軍流人犯脫逃例議處有受賄縱放者照主
守故縱受財律治罪○五年遵

旨議準凡遞回原籍交與地方官收管之犯果無生事
出境該地方官於每年冬底出具印甘各結並
將遞到人犯數目及有無生事出境之處一并
造冊報部察覈若遞回人犯該地方官不嚴行
管束致令脫逃出境者一名罰俸一月二三名
罰俸三月四名至六名罰俸六月七名至九名
罰俸九月十名以上者罰俸一年仍著落該地
方官勒限一年緝拏如逾限不獲每一名罰俸

三月四名以上罰俸一年十名以上降一級畱
任倘業已脫逃該地方官捏稱並未出境或遇
別處發覺或被旁人首告將該地方官照溺職
例革職該管上司知而不報照徇庇例議處○
又題準問擬徒罪之犯除順天府所屬州縣民
人仍送該府尹衙門發配其餘各省民人皆遞
回各該督撫衙門照伊原籍應發地方發配充
徒年限滿日交與原籍地方官安插管束不許

出境如該地方官管束不嚴致令脫逃出境者
經別邑拏獲除將該犯照例治罪外將該管原
籍地方官照遞回人犯出境例議處倘各該地
方有容畱潛住者事發將各該地方官亦照原
籍地方官例處分○又遵

旨議準凡犯法後潛逃各犯其藏匿之窩家除不知情
者仍照律免議外至若身繫職官而知情窩隱
者除革職外仍照本犯原罪治罪不準折贖至

於犯罪之人在於所屬境內藏匿地方官怠忽
因循不實力稽察或被旁人首發或被鄰境官
司拏獲將該地方官降一級畱任如有屬官藏
匿罪人該管上司不行察出揭叅該管上司亦
照此例議處○六年議準民間辭訟不於犯事
地方呈告則原告易駕虛辭而關提質審被告
又易於抗延支飾嗣後戶婚田土錢債鬪毆賭
博等細事必令於犯事地方告理不得於原告

所住之州縣呈告原籍之官亦槩不得濫準行
關彼處之官亦不得據關文即為拘發違者將
該地方官詳叅濫準行關者罰俸一年據關拘
發者罰俸六月如有於事犯之地方官處告準
關提質審而彼處地方官匿犯不解者照徇庇
例降三級調用○又議準州縣遞解人犯點解
之後或私行雇替或解役短少該管官皆不能
覺察直待人犯脫逃而後嚴叅究審已屬無及

嗣後遞解人犯解到之州縣務將解差點驗如
人數不足或有雇替情弊即令就近究明懲治
倘解到之州縣瞻徇鄰封情面不行究懲或解
至伊境內失囚與僉差不慎少差解役之員一
并叅處著落緝拏如起解地方官袒護衙役因
解到之州縣懲責其差遂含怨致怒於鄰封者
該督撫察訪有據即指名題叅將袒護之員照
徇庇例降三級調用○又議準凡發遣人犯酌

定名數分起解送如案內人犯衆多至五名以上者每五名作一起先後解送至起解時務必嚴加鎖鑰倘解役人等受賄開放若轉解之該地方官因前塗未曾鎖鑰不復稽察聽其散行將該地方官與前塗未曾鎖鑰官皆按罪犯輕重照不加肘鎖脫逃例分別議處如解犯於經過處所辱官詐財生事不法州縣官隱匿不報者降二級調用該管各上司未經察出者罰俸

一年若地方官已經申報而該管司道府不行
揭報督撫不行題叅者將該管司道府降二級
調用督撫降一級調用其申報之州縣免議○

又遵

旨議準凡軍流人犯單身逃遁者該管各官仍照例處
分外如攜帶妻子脫逃者初叅將該管官罰俸
一年兼轄官罰俸六月皆勒限一年緝拏不行
稽察之知府同知等官罰俸三月限滿不獲將

該管官降一級畱任緝獲之日準其開復兼轄
官罰俸一年○七年議準凡外省官員解送犯
人到部限十日內給發批迴倘於限內不行察
收及不給發批迴者該堂官即行題叅將該司
官照逾限例議處○又議準凡律載應流之犯
內如詐為

制書詐傳

詔旨偽造印信謀反叛逆強盜私鹽及左道妖言妄

言煽惑商魚船夾帶違禁物件謀殺出使官吏
漏泄機密事情採生折割毒藥殺人以藥迷人
各等案內流犯皆屬情罪重大在配所脫逃者
該管官及兼轄官除初叅二叅仍照原定例議
處外於二叅限滿之後再限一年緝拏限滿不
獲繫單身脫逃之犯該管官二叅罰俸一年者
三叅即降一級畱任緝獲之日準其開復兼轄
官二叅罰俸六月者三叅即罰俸一年繫攜帶

妻子脫逃之犯該管官二叅降一級畱任者三
叅即降一級調用未獲逃犯交與接任官照案
緝拏兼轄官二叅罰俸一年者三叅即降一級
畱任緝獲之日準其開復再此等重犯自配所
脫逃或私回原籍或仍匿發遣地方其各該地
方官原有緝拏之責按限緝獲止應免其處分
至鄰境各官果能盡心協捕應予議敘以示鼓
勵嗣後重罪流犯脫逃於鄰境經過之處及潛

匿之處各該地方官將單身脫逃之犯盤獲者
每一名紀錄一次將攜帶妻子脫逃之犯全獲
者每一起紀錄一次其餘別項流犯脫逃該管
各官並原籍地方官仍照定例遵行○又遵

旨議準凡充發煙瘴之軍流人犯於解送之時安插之
所犯人不服拘管或因約束過嚴以致輕生斃
命者該督撫察明果無陵虐逼勒致死情弊取
具印甘各結將地方官吏人等槩行免議如此

等充發煙瘴軍流人犯於經過州縣及安插地方有妄行不法等事州縣官徇情故縱隱匿不報者降二級調用或有疎防脫逃者將該管官降一級畱任限一年緝拏限內拏獲準其開復逾限不獲即照所降之級調用未獲逃犯交與接任官照案緝拏○又議準隔屬提拏贓盜及命案內斬絞重犯而彼處地方官膜視隔屬重案鄉地鄰保袒護本地方民人以致姦徒得以

肆行劫奪許提拏之地方官據實詳明督撫將縱劫之該地方官題叅解任俟此案獲犯審明題結之日將解任之員出具考語咨送引

見請

旨開復如在隔省亦即詳明本省督撫移咨彼省督撫會疏題叅將縱劫之地方官摘印解任俟此案犯人既獲審明題結之日方準將解任之員出具考語咨部引

見請

旨開復至於隔屬本無搶犯情弊而捕役賄縱捏稱被劫者除捕役照例治罪外其誤聽捕役捏稟以致將隔屬官詳揭題叅者審明之日將原叅之官即行開復將誤聽捕役之員照誤揭例降二級調用○又議準各處免死減等發遣人犯從發遣處逃回其容畱居住之房主繫官革職不行察拏之州縣官降一級罰俸一年該管知

府直隸州知州各罰俸一年五城正指揮照知
府議處副指揮照州縣官議處○又議準盜案
內凡地方官有向隔屬當舖起贓當舖或支飾
不認或匿贓先勒當本其該管官袒護當舖不
即起出移解以致盜案遲延許承審官詳明該
督撫將袒護之地方官題叅照徇庇例降三級
調用隔省者咨會題叅亦照此例議處○十三
年議準凡軍流人犯到配交地方官收領令府

廳嚴行稽察如有乘間脫逃者初叅將專管官

罰俸六月兼轄官罰俸三月皆限一年緝拏不

行稽察之府廳罰俸三月限滿不獲專管官罰

俸一年兼轄官罰俸六月

軍犯飭發該衛著伍其出具收管之員即

為專管官至管轄衛所之府廳若衛所已有兼轄官則府廳照統轄官例處分若知府繫兼轄之員則知府已照兼轄官例議以罰俸限緝其失於覺察之處例不重複議處毋庸再議止將該統轄廳員至軍流人犯到配除專管官不時照例處分

稽察外仍令該印官每月將人犯點驗二次并

造具年貌籍貫冊結呈報府廳稽覈如該印官不行點驗以致脫逃者將該印官罰俸一年若軍流人犯在配日久或交通官弁生事不法賄囑官吏潛逃無踪該府廳據實察報止將州縣官分別叅處該府廳免其覈叅若該府廳漫無覺察照失於覺察例罰俸一年並將任其交通之州縣等官照徇情例降二級調用○又議準凡徒犯到配發驛收管仍令該印官不時稽察

倘該驛官將徒犯私自役使印官即據實詳叅
將驛官罰俸九月至如徒犯脫逃初叅將專管
官罰俸六月兼轄官罰俸三月皆限一年緝拏
限滿不獲專管官罰俸一年兼轄官罰俸六月
有驛丞者以該驛丞為專管知縣為兼轄若該
縣無驛丞繫知縣管理者以該知縣為專管知
府為兼轄至該驛原有驛丞或因事故離任該
縣知縣暫行兼管遇有疎脫將該縣知縣照一
人兼兩任例就一任處分其兼轄職名毋庸開
叅再屬府轄之該驛丞應以知府為兼轄其知
縣職名亦毋庸開報若徒犯倩人替代私自回籍該驛官

受其賄囑私行縱放將該驛官革職治罪該印
官覺察詳報者免議若並無覺察將該印官罰
俸一年○乾隆元年覆準軍流人犯之妻如有
患病畱養本犯先行發遣者其妻於病痊日補
解時許親屬隨行以免中途陵辱等弊再軍流
人犯之妻如有年過六十以上本屬老病不能
隨行及患病遂成篤廢不能補解者仍取具鄰
族甘結該地方官勘驗明白加具印結將不能

隨行及篤廢不能補解緣由申詳該上司應行
報部者報部察覈行文本犯遣所俾令知之倘
有捏飾情弊將具結之親族里鄰照例治罪犯
妻立即補解其不行詳察出結轉詳之地方官
照謊報出結例降二級調用轉詳之上司罰俸
一年○又覆準各屬應拏人犯若果文武同心
速行差緝罪犯自難越境潛踪嗣後一應緝捕
事務如文員先行訪知即移會武弁或武弁先

行訪知即移會文員皆各遴選兵役合力協拏
不得推諉如文員已移會武弁而武弁不即差
兵協拏或武弁已移會文員而文員不即差役
協拏者皆照遲延推諉例議處至如鄰邑他省
沿邊沿海通緝人犯如於文到之後以隔屬岐
視文員不移會武弁協拏者照申報盜案互相
推諉例降一級調用或武弁不移會文員協拏
者亦照此例議處再文武官弁不行移會協拏

既定有議處如能實力緝獲亦當量事議敘如鄰邑官弁接到關文之後即能緝獲罪犯並他省沿邊沿海官弁於文到之後果能盤獲匪犯者皆照拏獲鄰境盜犯例每按二名紀錄一次再兵役人等乘緝獲人犯最易藉端滋事倘有妄指平民騷擾索詐以及賄縱者依律從重治罪外其失察徇庇之該管官如繫知情故縱照縱役貪贓例革職若失於覺察仍照失察衙役

犯贓例議處○三年議準隔省關提人犯以文到日為始限四月拏解鄰封關提人犯限文到二十日拏解如無故逾限不發該地方官照事件遲延例逾限不及一月者罰俸三月逾限一月以上者罰俸一年聽信地保差役捏稱並無其人並久經外出以空文回覆不發人犯者該地方官照匿犯不解例降三級調用○四年奏準凡遞回原籍無罪之人塗路脫逃者將僉差

之員罰俸三月○五年奏準凡軍流徒罪人犯在配脫逃有數案人犯同日脫逃者脫逃雖有數人地方官失於防範實繫一次應并案察議至一案內數人分為數日前後脫逃者脫逃日期既有不同地方官失於防範亦有數次按其脫逃次數計案議處○又奏準番役拘拏罪犯雖無私拷情弊但不將該犯即行送官或關禁在廟或鎖繫在家私自取供後送本官者將私

考取供之番役照例治罪如該管官不行察究將該管官照失於覺察例罰俸一年○六年覆準凡各衙門有差票事竣即宜察銷如差票不銷以致衙役持票恐嚇鄉民犯賊者將該管官照失察衙役犯賊例處分如衙役雖未犯賊將應銷差票遲延不銷該管官照事件遲延例分別議處○又議準凡在京問擬笞杖枷責解回原籍人犯應令該地方官安插之後加意稽察

管束無許出境生事如有復逃來京者除初次
二次本犯仍遞回原籍安插免其治罪該地方
官免其察叅外其復逃來京至三次以上之怙
終不悛之犯拏獲之日雖審無犯案亦按其原
犯情罪之輕重分別懲責仍遞回原籍交與該
地方官管束如再犯案從重歸結所有疎縱三
次來京之地方官照遞回人犯出境例分別議
處○八年覆準凡軍流人犯除未經起解者六


月照例停遣外已解至中塗如遇六月盛暑之時沿塗州縣即照例停遣不得遣令前往如到配將近及單身人犯自願前進者令該州縣訊取確供知會前塗一例接遞仍將該犯不願停遣緣由報部察覈○十年覆準凡外省罪應徒者除抵籍不遠即遇隆冬盛暑仍行遞解外其離原籍一千里以上者亦照軍流之例未經起解者槩行停解若已至中塗初冬十月經過地

方照常接遞至十一月初一日一例停解竝次年春融再遞如已將至原籍訊明本犯情願前進者轉移前塗州縣接遞六月盛暑之時亦準畱養倘地方官違例發解沿塗州縣濫行接遞者皆照應流人犯違例發遣例罰俸六月○十三年遵

旨議定地方官並營衛武職拏獲鄰境逃犯如繫軍流罪犯單身脫逃者每一名紀錄一次攜帶妻

子脫逃之犯全獲者每一起紀錄一次其拏獲
脫逃徒犯者二名紀錄一次準其前後接算聲

明議敘



欽定大清會典則例卷二十五